


Papiamento den Bon Dia

Ernesto E. Rosenstand



PENSAMENTO DI UN PENSAMENTO

**Nos pensamiento pa awe ta uno di Fred Shero.
Shero tabata un hungado di hockey Mericano.
El ayega di bisa:**

EXPERIENCIA TA E NOMBER CU NOS TA DUNA NA NOS FALTANAN.

Bunita bisa.

**Un hende cu e experiencia di bida a pasa den hopi cos.
No solamente cosnan bunita, ma tambe fracasonan.
Y e persona aki a siña for di e faltanan cu el a comete.
Anto e ora nos ta bisa cu e tin experiencia.**

EXPERIENCIA TA E NOMBER CU NOS TA DUNA NA NOS FALTANAN

EXPRESIONAN

Den tur idioma nos tin expresionnan.
Esakinan ta mara na e cultura di e pueblo.
Nos lo trece pa boso algun di nos expresionnan.
Nos expresion pa awe ta:

DRUIF NO POR PARI BEISHI

E ta nifica:

LOKE BO PLANTA ESEI BO TA COSECHA

Ban usa mas expresion den nos idioma.

CONSTRUCCIONNAN INTERANTE

**Den tur idioma tin construccionnan intereante.
Palabranan ta haya otro nificacion.
Esaki mes ta haci e idioma mas rico**

Ata un di nan aki

DEN CAREDA DI 8 OR

Loke kier men

MAS O MENOS

UNDA E FALTA...

**BAN USA CORECTAMENTE NOS IDIOMA
Den e frase aki tin un falta.**

**HUNGA CU SENTIMENTO DI HENDE, CUAL
NINGUN HENDE TA GUSTA.**

**UNDA E FALTA TA?
E FALTA ta cometi contra uso di conhuncion.
Den e caso aki e conhuncion CUAL.
Den e frase aki e mester tabata LOKE.
E frase corecto lo mester a bira:**

**HUNGA CU SENTIMENTO DI HENDE, LOKE
NINGUN HENDE TA GUSTA
Nos por a bisa tambe LO CUAL.**

Ban pone mas atencion riba uso di nos idioma.

CONOCE MIHO NOS CARIBE

Manera ya nos a bisa di e Caketionan a keda masha poco exprecion cultural.
Nan no tabatin tempo pa haci cultura.
Nan interes tabata mas tanto pa keda na bida.
Den nos museo arkeologico nos ta haya algun cos cu ta relaciona cu cultura indjan. Nan no ta hopi.
Ma tog nan ta duna bo un idea di con e hendenan a biba aki.
Cultura di e Caketionan no tabata di e halto ei.
Un di e motibonan tabata cu nan no a biba den stad.
Cultura di indjan cu a biba den stad ta hopi halto.
Ehempel:
Azteca y Mayanan na Mexico y Centro America y e Incanan na Sur America.
Y nan no tabata di e hopi ei.
Loke tambe a keda di e indjannan aki ta algun palabra.
Esakinan ta relaciona cu number di luganan manera tambe di mata y bestia.
Number di mata: Hubada, watapana, shimarucu.
Number di bestia: dori, toteki, waltaca.
Number di luga: Yamanota. Bushiribana, Guadirikiri.
Mas o menos na 1850 pastor A. J. koolwijk a haci hopi excavacion y el a manda esakinan Hylanda.
Na Rijksmuseum voor Volkenkunde na Leiden nos por mira artefactonan aki.
E pastor aki tabata un arkeologo amateur. Pues su excavacionnan no tabata cientifico.

Te otro siman